

Oficina di abogado David Kock a reacciona riba declaracion di Beth Twitty

Abogado ta considerando entama un caso

ORANJESTAD (AAN): Ayera DIARIO a ricibi un comunicado for di oficina di abogado Wix y Kock, cu tin como cliente Satish Kalpoe. E comunicado ta na Ingles y ta dirigi na Mama di Natalee Holloway esta Beth Twitty. E carta ta bisa cu e abogadonan a tuma nota di e declaracion haci pa sra Twitty riba 5 di Juli 2005, den cual el a yama entre otro Satish Kalpoe pa "criminal" involvi den un crimen violento contra di su yiu muher, cu ta cana libremente entre turista y ciudadano di Aruba. E comunicado ta sigui bisa cu e declaracion di Beth Twitty ta difamatortio, cu hopi prehuicio y totalmente ofensivo. Segun e abogado su cliente a

worde laga den libertad dia 4 di Juli 2005 pa un huez imparcial, kende a dicta cu e sospechonan legal cu a conduci na detencion, no tey mas.

Segun ley di Aruba, manera den tur pais civiliza, un persona ta inocente, te ora cu corte di husticia proba cu e ta culpable.

E comunicado ta bisa tambe cu su cliente ta mantene su inocencia y ta cooperando cu autoridadnan den investigacion di e caso.

Segun e comunicado S.K tin comprension pa frustracion di e famia Twitty y Holloway, sinembargo esaki no ta hustifica e declaracion difamatorio di sra Twitty, unda cu el a actua como huez y hurado y burdugo.

E comunicado ta splica cu si sra Twitty no stop cu su acusacionnan difamatorio, sr Kalpoe lo considera tuma pasonan legal, pa segura cu esaki lo no sosode mas.

S. Kalpoe tin confianza cu na final lo sali afor cu e ta completamente inocente.

Tambe e abogado a splica cu mirando con e caso ta bayendo, sr Kalpoe lo no duna entrevista ni comentario tocante di e caso, te ora cu e caso worde resolvi.

Na final di e comunicado Satish kalpoe ta gradici publico di Aruba pa e sosten cu nan a mustre Diamars.

E comunicado ta firma pa Elgin Zeppenfeldt, kende ta colega di David Kock cu no ta na Aruba na e momentonan aki.